

# Proponì adattaziuns organisatoricas

Ina grappa da lavur ha tematisà l'avegnir da l'exposiziun agrara Agrischa

DAD ANDREAS CADONAU / ANR

■ **L'Uniun purila grischuna sa fetschenta cun l'avegnir da l'exposiziun agrara suenter l'Agrischa 2019 en l'Engiadina. Ina grappa da lavur cun ils presidents dals comités d'organisaziun ha stipulà propostas per mauns da la suprastanza da l'uniun tetgala dals purs grischuns.** Il president dal comité d'organisaziun da l'Agrischa da la fin da l'emna passada a Cuira, *Sep Föhn*, è satisfatg dal resun da l'exposiziun. Cun circa 19000 visitaders durant dus dis san ils organisaturs da l'exposiziun agrara esser pli che cuntents. Föhn ha discurre da bleras reacziuns positivs davart da visitaders ed expositurs, uschia ch'il grond engaschi dal comité d'organisaziun e da voluntarias e voluntaris è sa cumprovà. Il president dal comité d'organisaziun ha numnà in dumber da 400 persunas engaschadas en favur da l'event e quai betg sulet durant ils dus dis d'exposiziun. La gronda part dals voluntaris èn puras e purs pronts da prestar lavur per l'exposiziun ed uschia contribuir a la reputaziun da l'agricultura vers la populaziun betg agrara. Föhn ha ditg che la prontadad da prestar quella lavur saja avant maun ed i saja stà bel da vesair differents gidanters sin il plaz da lavur ed activs, era sch'els n'erian betg nudads sin il plan da lavur. Auters hajan ins anc stuì persvader en il discurs e far attent a la necessitad da l'agricultura da sa preschentar a la publicitad per far attent a las prestaziuns agraras. Föhn ha fatg part dad ina grappa da lavur instradada da l'Uniun purila grischuna cun l'incarica da stipular strategias e propostas per l'avegnir da l'exposiziun agrara grischuna. Decidida è anc l'exposiziun proxima en l'Engiadina l'onn 2019, ina eventuala cuntinuaziun e davart ritmus e modus decida la supra-



L'Uniun purila grischuna decida davart la cuntinuaziun da l'Agrischa suenter l'onn 2019.

MAD

stanza da l'Uniun purila grischuna proximamain.

## La lavur da la grappa è terminada

La lavur da la grappa da lavur è terminada e la conferenza dals presidents da las uniuns purilas localas ha prendì enconu-

schientscha da las propostas avant intginas emnas. L'exposiziun sco tala, il ritmus e las tschintg regiuns d'exposiziun n'ha la grappa da lavur betg dubità. Föhn ha numnà divers detagls organisatorics che sajan da megliar era per destgargiar il comité d'organisaziun. La lavur organisatorica per l'exposiziun entschaviva

bunamain dus onns avant l'event e l'engaschi saja considerabel. La grappa da lavur propona dad installar ina persuna responsabla per la gastronomia che surpiglia quella incumbensa en tut ils comités d'organisaziun per garantir ina tscherta cuntinuitad. La sparta da l'exposiziun da biestga saja gia organisada, uschia ha

Föhn menziunà ed el vesa er adattaziuns pertutgant il sponsoring. Medemamain part da la grappa da lavur ha *Curdin Foppa* fatg. El ha presidià il comité d'organisaziun da l'Agrischa 2016 a Glion ed ha ditg che la grappa da lavur saja da l'avis ch'il concept sco tal da l'exposiziun saja sa cumprovà. Sin fundament da las experiences hajan ins discutà e proponì correcturas tscha e là. Correcturas che sajan curdadas sin in eco positiv tar ils presidents da las uniuns purilas localas. La prontadad da s'engaschar per l'exposiziun agrara saja dada da la maioritad da puras e purs, era sch'in u l'auter saja a l'entschatta sceptic. Impurtant è per Foppa dad avair in comité d'organisaziun pront da chaminar ordavant e trair il char.

## Agrischa è ina marca

Part da la suprastanza da l'Uniun purila grischuna fa *Curdin Capeder*. Il president da l'Uniun purila Surselva ha prendì enconuschientscha da las explicaziuns da la grappa da lavur. El ha fatg attent che l'exposiziun agrara saja garegiada dals sponsurs che veglian sa chapescha cuntinuar en il ritmus sco fin uss. Midar il ritmus da l'exposiziun sin sulet mintga dus onns ha per consequenza che las singulas regiuns d'exposiziun vegnan mintga diesch onns en roda dad organisar. In dischavantag or da vista da la cumposiziun dal comité d'organisaziun. Per Capeder èsi d'avantag sch'ina part dal comité sa cumpona da commembers ch'han gia ina giada organisà l'event per pudair purtar las experiences en il gremi nov. Spetgar memia ditg cun la decisiun davart la cuntinuaziun da l'Agrischa na dastga l'Uniun purila grischuna betg. Vul ella cuntinuar fin qua cumenzan prest las preparativas per l'Agrischa 2020.